

foddgfluung

fangäledds

im däif väschneidn gaddn
joong si drei achhörnlä
ä schwazz, ä brauns und ä rouds
immä widdä vo amm baam
zum andern und widdä zurück
und hii und heä
wäi wennis fangäledds schbilln
und su schnell wäis kummä senn
is allers aa scho widdä vobei
vo di äsd riesld dä schnäi

rotkehlchen

immä widdä dauchd
wemmä grood ned droo denkn
wäi assm nichts
irchndwou im gaddn
wäi wenns aff uns gwadd hädd
ä rotkehlchen auf
es is immä desselbe
als weäs unschderbli

eichen

hölderlins eichbäume heute

ihr könnt nix däfiä dassäs dou bei uns
seid meä wäi achzg joä aushaldn mäißd
ihr seid aa nix bessers wäi di andern baim
ihr gräichd im frähjoä neie bläddä
und lassd achälä und bläddä falln im herbsd
fiä däi wou eich eibflanzd hamm
woäd ihr di »arier« undä di baim
di andern woän ned daidsch gnouch
ihr habd dou draff goä nix gehm
ihr habd gmachd wos gmachd werrn mou
ihr habd däif im buudn worzln gschloong
ihr seid middä zeid in di häih gschossn
däi wou eich eibflanzd hamm
senn alle midäränandä scho undä dä erdn

ihr schdäihd immä nu kerzägrood dou
bleibd bidde sulang wäis gäihd schdäih!
di viigl freiä si (und iich miich aa)